


天一閣藏明代方志選刊

天一閣藏明代方志選刊

河間府



本頁原缺據古今圖書集成第柒拾冊第四十五頁補

河間府志序

郃君相之守河間也敷政境內
百度聿新慨郡志之廢缺乃託
諸司諫樊君深爰修次焉志成
復託司諫韓君威問序於璧璧
觀之書凡二十八卷藂彙放逸
法象人文美哉淵乎其言也亦

E056/1

時有所異發云夫天官錯峙各有道屬而幽州故占尾箕戰國之紛紜諸侯率不保定其域土朝夕易主至不可詰也今日當屬趙兼占大梁是又嘗屬齊故復以媿訾占乎志稱曰地故顓頊之國而九域寰宇并圖經等

浚儀乃有高陽城孤棘商丘又
皆以為顓頊之墟顓頊者高陽
氏也今標其地曰顓頊豈非取
一高水名高陽乎義莫之惑矣
其書頗稱唐晉邢地按詩唐譜
所箋疏唐乃在太原晉陽寔堯
墟也地有晉水成王封叔虞焉

而子癸因以晉號今河間以東
陽稱亦必同一晉哉邢治龍岡
本秦信都奔襄國蓋梁所謂保
義者而勢縈紆昔與河間接山
海經炎帝生鉅封人物表鉅封
蓋黃帝師而已不明為何所人
許繇者諸侯也見重於堯耳斯

則係之河間是必有足激者相
參驗而事可稽乎至州支縮高
之類及它所傳聞多核直其激
於天人者豈不閎博哉此亦其
小者不必序序其大者慨焉始
余讀周官書職方保章之屬未
嘗不歎而廢書曰彼於天人之

際何其競競也豈以是作無益
侈譚說哉將以經世務而行王
道也是故物土者知其利害詔
其辟忌誦其傳道於是乎正歲
布之四方而觀新物以為未足
也表次舍軌躔運而察妖祥焉
登之方冊上之人握其手實而

屢省之乃有所裁成輔相矣古
昔先民繇此其選率而上之以
為法若是者可謂之徒文具爾
乎予為太史氏竊觀往事我

國朝嘗三致意及予適四方見天
有遺警地有遺飭民有失職於
所利病矣彼豈皆無文獻足徵

耶一切之法惟期會之為急而
裁成輔相之政縣不以言州州
不以言府府不以言大府即言
之上下之間外一膜皆兩疑其
跡上以其籍為壽張而下因謂
之無益于事其有惕然而警於
心者蓋不能盈什一焉其甚者

又或并其籍而去之曰害已嘻
弊也極矣鄙守蒞治未幾乃慨
然有志於是則夫仰觀俯察鑒
古昭今易俗更化孜孜以求民
瘼者有足徵矣賢不是在乎予
故為之序俾後之觀志者得以
考信云爾

嘉靖庚子仲秋日

賜進士出身南京禮部尚書前翰

林院學士兼

太子少詹事

經筵日講官奉勅管錄

累朝御文

國史南郡張璧撰



151021

河間府志序

竊謂河間密邇

帝畿卽古屏翰之國後雖建革有殊而馭民物以藩王
室者其事同也古有列國之史而今有一方之志
是雖名謂有殊而核名實以記時事者其義同也
邇予承乏河間恪守郡事凡訪治問俗救偏補敝
亦嘗用心於此矣但恐事有淪沒而不知情有散
漫而不達則詎敢以已之所行者爲已至耶苟得
記事之書如郡志者按圖冊而考之庶可得其一

二而今乃廢缺莫稽焉是可憂也每聞司諫樊公
素嘗留心於斯者今有年矣盍往謀之遂乃勞其
編定命梓成書然後往事予可得而知也時事予
可得而傳也善者予可得而法也賢者予可得而
禮也財物予可得而通融也風俗予可得而損益
也其於願治之心不有助耶後凡蒞民者酌古準
今將有所據則是書不但有益於已也

嘉靖庚子孟春望日中憲大夫知河間府事澤州

郤相謹識

河間府志自序

西田樊深曰志者郡邑之史也古以來恒有之而于今爲重蓋周禮有小史以掌邦國之志有外史以掌四方之志而又有職方氏以掌天下之圖是以此焉不得猶求之他無足慮也矧今史之日記漫無足徵而纂實錄采民風猶於郡邑是稽此其爲志也詎可緩乎河間今

王畿重地其在遼金及勝國戎馬馳突文獻滅裂識者慨焉後雖有程氏舊刻亦僅成而未備鄭氏家集

每欲備而未成廢缺相循卒爲墜典邇者龍山部
公守河間百度俱新治益閒暇乃偕諸僚友西泉
董公豫齋徐公益泉畢公錫巖顧公中湖彭公造
予而屬以是焉予曰瀛而無志猶無瀛也志而不
工猶無志也嗟予踈陋何以堪此然又懼夫機會
難逢時焉易失恐後之慨今無異於今之慨昔也
遂敢稽諸墳典質諸譜牒參之舊輯撫以新聞析
事類而條理秩焉肆採擇而遺闕補焉加刪存而
褒貶寓焉原利病而民性資焉爲綱十有六爲目

六十有一列卷二十有八凡一方之山川境土習俗往蹟予咸蒐輯而罔遺矣若夫述恠誕以表竒特著事應以實祥異增仙釋以備觀覽固名教之所禁者予皆得而略云